

# Quant vint a la prochaine feste

Qu'Amours tenoit son parlement,

Je lui presentay ma requeste

Laquelle leut tresdoulcement,

Et puis me dist : « Je suy dolent (1)

Du mal qui vous est avenu,

Mais il n'a nul recouvrement,

Quant la mort a son cop féru (2).

Eslongnez hors de vostre teste

Vostre douloureux pensement !


Moustrez vous homme, non pas beste !

Faittes que, sans empeschement,

Ait en vous le gouvernement

Raison qui souvent a pourveu

En maint meschief (3) tressagement,



*Quant la mort a son cop féru.*

*Reprenez nouvelle conquête !*

*Je vous aideray tellement*

*Que vous trouverés Dame preste*

*De vous amer tresloyaument,*

*Qui de biens aura largement.*

*D'elle serez amy tenu :*

*Je n'y voy autre amendement,*

*Quant la mort a son cop féru. »*

*1. Dolent : Triste. 2. Féru : A frappé son coup. 3. Meschief : Malheur.*

*Charles d'Orléans (1394-1465)*